

**О‘ЗБЕКISTON RESPUBLIKASI
VAZIRLAR MANKAMASINING
QARORI**



**ПОСТАНОВЛЕНИЕ
КАБИНЕТА МИНИСТРОВ
РЕСПУБЛИКИ УЗБЕКISTАН**

« 3 » декабрь 2019 у.

№ 967

Toshkent sh.

**Олий таълим муассасаларини босқичма-босқич ўзини ўзи
молиялаштириш тизимига ўтказиш тўғрисида**

Ўзбекистон Республикаси Президентининг “2017-2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини “Фаол инвестициялар ва ижтимоий ривожланиш йили”да амалга оширишга оид давлат дастури тўғрисида” 2019 йил 17 январдаги ПФ–5635-сон Фармони ва “Олий ва ўрта махсус таълим тизимига бошқарувнинг янги тамойилларини жорий этиш чора-тадбирлари тўғрисида” 2019 йил 11 июлдаги ПҚ–4391-сон қарори ижросини таъминлаш ҳамда олий таълим муассасаларининг молиявий бошқарув тизимини тубдан такомиллаштириш, уларга бюджетдан ташқари маблағларни жалб қилишда кўпроқ имкониятлар яратиш, олий таълимдаги ислохотлар самарадорлигини ва таълим сифатини янада ошириш, профессор-ўқитувчилар ва талабаларга замонавий шарт-шароитлар яратиш мақсадида Вазирлар Маҳкамаси қарор қилади:

1. Ўзбекистон Республикаси Президентининг “Олий ва ўрта махсус таълим тизимига бошқарувнинг янги тамойилларини жорий этиш чора-тадбирлари тўғрисида” 2019 йил 11 июлдаги ПҚ–4391-сон қарорига мувофиқ 2020 йилдан бошлаб таълим хизматлари бозорида олий таълим муассасаларининг айрим бакалавриат таълим йўналишлари ва магистратура мутахассисликларига талаб юқорилиги ва молиявий барқарорлигини инобатга олиб, уларни босқичма-босқич ўзини ўзи молиялаштириш тизимига ўтказишга розилик берилганлиги маълумот учун қабул қилинсин.

2. Илмий педагогик салоҳияти юқори, молиявий фаолияти барқарор, моддий-техника базаси етарли даражада, таълим хизматлари бозорида бакалавриат таълим йўналишлари ва магистратура мутахассисликларига талаб юқорилигини инобатга олиб, 2020 йил 1 январдан бошлаб, тажриба-синов тариқасида ўзини ўзи молиялаштириш тизимига ўтаётган олий таълим муассасалари рўйхати иловага мувофиқ тасдиқлансин.

3. Қуйидагилар ўзини ўзи молиялаштириш тизимига ўтаётган олий таълим муассасаларининг қўшимча вазифалари этиб белгилансин:

қўшимча таълим хизматларини кўрсатиш, иқтисодиёт тармоқлари мутахассисларининг малакасини ошириш ва бошқа пуллик хизматларни жорий этиш;

тегишли соҳадаги долзарб муаммоларни ҳал этишга йўналтирилган илмий изланишларни ташкил этиш, соҳа бўйича илмий ва илмий-педагог кадрлар тайёрлаш, илмий-тадқиқот муассасалари билан ҳамкорликда соҳанинг илмий муаммоларини ҳал этишга йўналтирилган фундаментал, амалий ва инновацион изланишларни амалга ошириш;

республика ва хорижий олий таълим муассасалари ҳамда илмий марказларга истикболли ёш битирувчиларни магистратура ва докторантурага мунтазам юбориш орқали олий таълим муассасасининг илмий-педагогик салоҳиятини доимий ошириб бориш;

замонавий педагогик технологиялардан кенг фойдалана оладиган ва илмий изланиш олиб борадиган профессор-ўқитувчиларни танлаш мақсадида олий таълим муассасаси ҳамда профессор-ўқитувчилар ўртасида бир йиллик муддатли шартномалар тузиш амалиётини жорий этиш.

4. Ўзини ўзи молиялаштириш тизимида ўтаётган олий таълим муассасалари васийлик кенгашларига қуйидаги ваколатлар берилсин:

олий таълим муассасасининг молия йили учун шакллантириладиган бизнес-режаси (унда муассасанинг асосий фаолияти кўрсаткичлари жумладан, муассасада кадрлар тайёрлаш тизимини ташкил этишнинг мақсадлари, режалаштириладиган натижалари ва таҳлили кўрсатилади) ҳамда даромадлар ва харажатлар параметрларини тасдиқлаш ва уларнинг ижросини муҳокама қилиш;

олий таълим муассасаси томонидан автотранспорт воситалари, шунингдек, бошқа асосий воситаларни харид қилиш ва уларни ҳисобдан чиқаришга (бино ва иншоотлар бундан мустасно) ҳамда бино, иншоотларни капитал таъмирлаш, реконструкция қилишга рухсат бериш;

олий таълим муассасасининг йиллик ҳамда даврий молиявий ҳисоботларини муҳокама қилиш ва тасдиқлаш;

олий таълим муассасасини ривожлантириш ва молиявий фаолияти билан боғлиқ бошқа масалаларни ҳал этиш, шу жумладан мақсадли капитал жамғармасини (эндаумент фонд) шакллантириш;

зарур ҳолларда, олий таълим муассасаси ректорининг асосланган мурожаатига кўра, олий таълим муассасасининг молиявий фаолиятини қўллаб-қувватлаш мақсадида республика тижорат банкларидан кредитлар олиш масалаларини кўриб чиқиш;

олий таълим муассасаси фаолиятининг асосий йўналишларини белгилаб бериш, шу жумладан, янги факультетлар, бакалаврият таълим йўналишлари ва магистратура мутахассисликларини жорий этиш;

бўйсунуви бўйича тегишли вазирлик ва идора билан келишилган ҳолда олий таълим муассасаси ректори ва олий таълим муассасаси кенгаши ваколатини белгилаш, шу жумладан, харажатлар сметасига ҳамда штатлар жадвалига ўзгартиришлар киритиш, асосий воситаларни харид қилиш ва олий таълим муассасаси тасарруфидаги маблағлар, моддий бойликлар ва мулкдан фойдаланиш бўйича ваколатлар доирасини белгилаш;

олий таълим муассасасида самарадорлик мезонларига асосланган меҳнатга ҳақ тўлаш тизимини жорий этиш ва тартибини белгилаш.

5. Ўзини ўзи молиялаштириш тизимига ўтаётган олий таълим муассасаларининг бўйсунуви бўйича тегишли вазирлик ва идоралар 2020 йил 1 январга қадар мазкур қарор талабларидан келиб чиқиб олий таълим муассасаларининг васийлик кенгаши тўғрисидаги низомни ва васийлик кенгашларининг янгиланган таркибини қайта кўриб чиқсин ва тасдиқласин.

6. Ўзбекистон Республикаси Президентининг “Олий ва ўрта махсус таълим тизимига бошқарувнинг янги тамойилларини жорий этиш чоратадбирлари тўғрисида” 2019 йил 11 июлдаги ПҚ–4391-сон қарорига мувофиқ ўзини ўзи молиялаштириш тизимига ўтаётган олий таълим муассасаларига қуйидаги ҳуқуқлар берилганлиги маълумот учун қабул қилинсин:

а) юқори малакали мутахассисларни жалб этиш, кўрсатиладиган таълим хизматлари сифатини ошириш мақсадида ходимларга устамалар ва моддий рағбатлантиришнинг бошқа турлари миқдорларини мустақил белгилаш;

б) иқтидорли, шунингдек аҳолининг ижтимоий ҳимояга муҳтож қатламларидан бўлган талабаларни моддий рағбатлантириш ва қўллаб-қувватлаш;

в) сақлаш харажатлари, вазифа ва мажбуриятларни бажариш, ўқитишнинг инновацион шакл ва услубларини жорий этиш ҳамда ходимларни қайта тайёрлаш ва уларнинг малакасини ошириш, моддий-техник базани мустаҳкамлаш, дастурий таъминотлар, замонавий ахборот-коммуникация воситалари, ўқув ва илмий лабораториялар ҳамда сарфланадиган лаборатория материалларини (реактивлар, кимёвий идиш, бутловчи, биологик материаллар ва бошқа объектлар), шу жумладан китоблар, журналлар, ўқув адабиётлари харид қилиш ва чоп эттириш учун маблағларни мустақил сарфлаш;

г) олий таълим муассасаси инфратузилмасига сервис хизматлари кўрсатишнинг алоҳида турлари, жумладан бино ва иншоотлар, талабалар турар жойлари, спорт объектларидан фойдаланиш, уларни тозалаш, таъмирлаш, компьютер техникаси ва телекоммуникация тармоқларини сақлаш ва юридик хизматлар кўрсатишни аутсорсинг шартларида ташкил этиш;

д) бўйсунуви бўйича тегишли вазирлик ва идора билан келишилган ҳолда:

олий таълим муассасасининг илмий-педагогик салоҳияти, унинг моддий-техник базаси имкониятларини инобатга олиб, талабаларни тўлов-контракт асосида ўқишга қабул қилиш параметрларини белгилаш, янги бакалаврият таълим йўналишлари ва магистратура мутахассисликларини очиш;

олий таълим муассасасини ўзини ўзи тўлиқ молиявий таъминлаш миқдоридан келиб чиқиб, тўлов-контракт асосида ўқитиш қийматини белгилаш.

Бунда, 2020/2021 ўқув йилидан бошлаб, тўлов-контракт асосида қабул қилинган талабалар учун тўлов-контракт қиймати миқдорлари бир талабани бир йиллик ўқитиш харажатларидан келиб чиқиб белгиланади.

7. Шундай тартиб ўрнатилсинки, ўзини ўзи молиялаштириш тизимига ўтаётган олий таълим муассасасида тўлов-контракт асосида таълим олаётган талабаларнинг тўлов-контракт маблағларни тўлаш муддатлари томонларнинг ўзаро келишувига кўра шартнома асосида белгиланади.

8. Белгилаб қўйилсинки:

ўзини ўзи молиялаштириш тизимига ўтказилган олий таълим муассасаларида давлат буюртмаси асосида таълим олаётган талабаларни ўқитиш билан боғлиқ харажатлар учун бюджет маблағларини ажратиш бакалавриат таълим йўналиши (магистратура мутахассислиги), тури, босқичи ва шаклидан келиб чиқиб давлат гранти асосидаги ўрин учун сарфланадиган харажатларнинг норматив миқдорларига мувофиқ амалга оширилади. Бунда, бюджетдан ажратиладиган маблағларнинг йиллик чекланган суммаси давлат гранти асосида таълим олаётган контингент сони ва ҳар бир давлат гранти асосидаги ўрин учун сарфланадиган харажатларнинг норматив миқдорлари асосида ҳисобланади;

ўзини ўзи молиялаштириш тизимига ўтказилган олий таълим муассасаларида давлат буюртмаси асосида таълим олаётган талабалар учун бюджет маблағлари бўйсунуви бўйича тегишли вазирлик ва идора ҳамда олий таълим муассасаси ўртасида имзоланадиган давлат буюртмасини бажаришни молиялаштириш битими асосида харажатлар сметасида бюджет тизими бюджетлари иқтисодий харажатлар таснифининг бир сатрида режалаштирилган ҳолда ажратилади (мақсадли маблағлар, шу жумладан стипендия тўловлари, олий ўқув юртидан кейинги таълим харажатлари, капитал қўйилмалар харажатлари ва Ўзбекистон Республикаси Президенти ва Вазирлар Маҳкамаси қарорлари асосида ажратиладиган маблағлар бундан мустасно);

ўзини ўзи молиялаштириш тизимига ўтказилган олий таълим муассасаларида давлат буюртмаси асосида таълим олаётган талабалар учун ажратилган бюджет маблағлари (мақсадли маблағлар бундан мустасно) олий таълим муассасасининг бюджетдан ташқари маблағлар бўйича шахсий ғазна ҳисобварағига ўтказилади ва ҳисобот даври охирида маблағларнинг қолдиғи олий таълим муассасаси ҳисобида қолдирилади;

ўзини ўзи молиялаштириш тизимига ўтказилган олий таълим муассасаларининг бюджет ва бюджетдан ташқари маблағларидан оқилона ва самарали фойдаланиш, жумладан ходимлар меҳнатига ҳақ тўлаш ва стипендия тўловларини ўз вақтида ва тўлиқ амалга ошириш учун жавобгарлик мазкур муассасалар ректор (директор)лари зиммасига юкланади.

9. Ўзбекистон Республикаси Олий ва ўрта махсус таълим вазирлиги Молия вазирлиги билан биргаликда 2020 йил 1 январга қадар:

давлат буюртмаси (давлат гранти) асосида таълим олаётган талабаларни ўқитиш учун олий таълим муассасасига ажратиладиган

Ўзбекистон Республикасининг Давлат бюджети маблағларини бакалаврият таълим йўналиши (магистратура мутахассислиги), тури, босқичи ва шаклидан келиб чиқиб ҳар бир давлат гранти асосидаги ўрин учун сарфланадиган норматив харажатларни ҳисоблаш методологиясини;

бўйсунуви бўйича тегишли вазирлик ва идора ҳамда олий таълим муассасаси ўртасида имзоланадиган давлат буюртмасини бажаришни молиялаштириш намунавий битими лойиҳасини;

давлат буюртмасини бажаришни молиялаштириш доирасида олий таълим муассасасига ажратилган маблағларни сарфлаш тартибини ишлаб чиқсин ва тасдиқласин.

Олий таълим муассасаси васийлик кенгаши томонидан тасдиқланган молиялаштириш манбалари кесимида шакллантирилган молиявий ҳисоботи белгиланган тартибда бўйсунуви бўйича тегишли вазирликлар ва идораларга ҳамда Ўзбекистон Республикаси Молия вазирлигига тақдим этилиши белгилаб қўйилсин.

10. Ўзбекистон Республикаси Молия вазирлиги тизимида олий таълим муассасалари бўлган вазирликлар ва идоралар билан биргаликда ўзини ўзи молиялаштириш тизимига ўтган олий таълим муассасалари ҳисобига иқтисод қилинган Ўзбекистон Республикаси Давлат бюджетининг маблағларини ҳар молия йилида флагман олий таълим муассасалари фаолиятини ривожлантириш учун йўналтиришни назарда тутсин.

11. Ўзбекистон Республикаси Олий ва ўрта махсус таълим вазирлиги, Иқтисодиёт ва саноат вазирлиги, Молия вазирлиги 2021 йил 1 ноябрга қадар тажриба тариқасида ўзини ўзи молиялаштириш тизимига ўтказилган олий таълим муассасаларининг молиявий ҳолати натижалари ҳамда қолган олий таълим муассасаларини мазкур тизимга ўтказиш, тизим учун ишлаб чиқиши лозим бўлган норматив-ҳуқуқий ҳужжатлар бўйича Вазирлар Маҳкамасига таклиф киритсин.

12. Ўзбекистон Республикаси Олий ва ўрта махсус таълим вазирлиги манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни икки ой муддатда ушбу қарорга мувофиқлаштирасин.

13. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари – Ўзбекистон Республикаси молия вазири Ж.А. Кўчқоров, Ўзбекистон Республикаси Бош вазирининг ижтимоий ривожлантириш масалалари бўйича ўринбосари А.А. Абдуҳақимов ҳамда Ўзбекистон Республикаси олий ва ўрта махсус таълим вазири И.У. Маджидов зиммасига юклансин.

Ўзбекистон Республикасининг
Бош вазири



А. Арипов

Вазирлар Маҳкамасининг
2019 йил “3” декабрдаги 967-сон қарорига
илова

**2020 йил 1 январдан бошлаб, тажриба-синов тариқасида ўзини ўзи
молиялаштириш тизимига ўтказилаётган олий таълим муассасалари
РЎЙХАТИ**

1. Самарқанд давлат чет тиллар институти
2. Самарқанд иқтисодиёт ва сервис институти
3. Тошкент давлат юридик университети
4. Тошкент давлат иқтисодиёт университети
5. Тошкент молия институти
6. Тошкент давлат шарқшунослик институти
7. Тошкент фармацевтика институти
8. Ўзбекистон давлат жаҳон тиллари университети
9. Урганч давлат университети
10. Тошкент темир йўл муҳандислари институти

